





P1

江河渡秋以貳拾柒年拾壹月受事旨議兵將作何部署
哨道作何等險夷作何偵探器械如何繕治演習先登
作何激勵糧運作何計量師涉作何預計俱經詳允竭盡
夜料理去後烏江河派巡播治柒捌拾里而近又該職秋
再議必探水西哨松落濠水探平越哨渡疆界河及川中
菁个關畢集方會哨齊驅若獨以壹哨嘗敵賊必併力一
向前事可鑒俱於拾貳月具詳參院允示遵行間本年貳
月誓師後水西把事王嘉猷領防守烏江兵自願參月初
叁初陸等日攻奪烏江關緣猷向與賊唇齒深交旣願破
關絕好自難膠執前議就經犒賞大率毋以水漲逗遛愆

期壩陽守備陳雲龍同永順兵不依主將令於叁月拾壹日徑奪烏江關斬獲賊級壹拾玖顆永順彭宗卿彭牯牛等於鬼國斬級陸顆俘獲肆口焚燒關樓附近關邊賊寨燒掃一空看係孤懸恐難屯割星飛督催鎮雄府知府隴澄把事王嘉猷兵馳赴雞家寨出刀靶水催安疆臣兵馳赴昌田驛出落灣水犄角策應拾貳日就該統兵遊擊謝崇爵雲南坐營中軍張澍督領雲南祿州等土兵標募兵都司遊擊張秉忠督領泗城土知州岑紹勳等兵各乘勢渡江攻克河渡關前後擒斬首從姦細共斬級壹百伍拾柒顆生擒貳拾陸名俘獲伍名口賊知我兵各路未進於

拾伍拾柒日併力前來衝突兩關不守官兵損折立檄隴澄躡蹤邀賊河渡歸路如道里迂迴乘虛直擣賊巢據報救河渡必叁日抵播境只貳日與其攻外而遠不若攻內而近等情賊見隴澄深入當日奔回隨據隴澄揭稱該標下中軍劉岳督本府領把事王嘉猷於叁月拾叁肆等日攻破苦竹關平嶺關共殺賊斬首捌拾玖名投降貳百伍拾叁名拾陸日自刀靶水移營賊兵截路追過新站前後殺賊肆百柒拾陸名苗頭阿曲等伍名據報夷俗原不斬級實止解苗頭伍顆餘功未委虛的又該畢節督兵副使洪澄源統兵叅將朱鶴齡督宣慰使安疆臣領日把陳恩

張崑頭目柯阿箇阿五等於叁月拾叁日分兵進取首克
新關從間道破傳頭石壁一帶關隘打破大紅關胡石口
黑水關拾伍日攻破板山圍前後共斬殺射死苗賊貳百
柒拾陸名亦稱夷俗原不斬級未見功報招撫國民男婦
陸百房計壹千肆百叁拾伍名口拾捌日目把陳恩等調
撥以白魏良海等督兵於清塘水等路堵截應龍歸路生
擒張受等壹拾玖名拾玖日夜賊兵前來劫營生擒彭四
等陸名本日各目分兵叁哨攻破落濠關會劄大水田將
桃溪衙違禁房屋燒燬貳拾叁日督同義官李武楊澄清
等生擒賊陳元等捌名據報前後殺賊叁百捌拾陸名未

見斬級功報實解生擒苗賊楊四元都哥張受彭四等壹
拾柒名又崔畢節道移解生擒陳元等捌名千戶王三錫
王有聲李武等斬級伍顆轉解驗明訖又據隴澄揭報師
次大水田發兵攻打長箐賊拒敵殺死督兵把總陳啓禮
并隨軍拾餘命當各兵奮勇追殺賊柒拾餘名賊首楊豹
阿寡等伍名將賊首首級伍顆具解軍門委驗訖叁月貳
拾陸日播賊應龍差小童吳比金萬富齎送書儀驛貳隻
金銀壹壹貳副折程貳拾兩衣著段貳端赴營投見當拆
來書驗係楊應龍妻田氏餽送禮單當將來差斬示營門
餽送儀物同禮單齎解乞賜驗明貯庫等情及將生擒探

聽賊犯羅才羅慶并解前來審出前情無異又據安疆臣報稱參月貳拾玖日逆賊楊應龍父子因見鎮雄斬其來使首其魏儀親領苗兵朵萬分作伍路前來迎敵該水西鎮雄合兵自本日卯時至申時鏖戰斬殺賊首偽提調頭目伍拾餘人內有偽內官伍人各路共殺賊兵萬餘屍橫遍野前伍拾人內有壹人全身絹段金銀器械查係賊子惟棟待查的又報外我兵損折百拾餘名重傷參百餘名輕傷伍百餘名就據土官溫希舜當陣擒獲馬兵何老吐供相同隨准畢節道洪副使移解拒敵當先騎馬出陣賊首首級壹百零壹顆生擒者亞壹名轉解軍門行委三司

會同委官知州龍時躍王應昌辨驗訖又據安疆臣報稱逆賊心腹提調尚意黃繼枝管押板山落潮馬寨一帶苗兵參月貳拾玖日貳賊親在衝鋒逆首巨細事機皆其內參外替先奉院道密諭遵承間就該本道用間謀計令貳賊來營商議退兵逆賊果信隨差貳賊同坐寨頭目夏文茂等貳拾肆人齎詐降文壹角另具禮單開送金銀臺盃貳副折段銀捌兩鞍馬貳副槍刀弩箭等項前來當伏兵河口將貳賊并坐寨頭目夏文茂從賊擒拏審實將原詐降文同原禮物移解到道轉解審驗有黃繼枝自盡身故斬級解驗明白賊從逃去參名又據安疆臣隴澄報稱兵

劉大水田被賊據守金刀坑圍阻截兵糧四月十一日發
兵攻打賊黨力拒我兵奮勇齊登殺死賊首阿富等陸名
苗賊叁拾肆名餘賊拚死拒捕隨豎招降旗幟該團男婦
出圍乞降共約一百二十五房收獲鐵券牌一面同賊級
六顆解驗訖又據安疆臣隴澄報稱四月十三日督兵直
抵播州治桃溪口獅子橋各賊奔潰隨將衙宇家廟新川
後川等衙違禁房宅闔州賊黨民房悉行燒燬一面於十
五日發兵直出奪復烏江老軍關賊兵截伏當令馬軍衝
殺賊潰投箒次日黎明到關我兵奮勇奪占前後殺賊一
百二十餘名生擒五十九名招降二百六十二房暫於果

哈地方安插節次擒賊招降俱該畢節道洪副使朱叅將
移報相同先是職秋祇奉三院憲檄移行新任都司徐成
整棚標募土漢督中軍馮邦濟把總王真操習火器銃砲
手等兵催調廣西龍英歸順等州思明府等兵行委指揮
羅萬善督押前來雲南守備沐榮把總署守備事陳用實
催調雲南標募沅廣等兵行委原任守備童龍整棚雲南
安時泰祿州廣南等兵移行原領兵遊擊都司張秉忠整
棚泗城等兵移行督糧道梅叅議分發糧餉起集運夫駝
馬分委普安知州龍時躍定番知州王應昌運發養龍河
渡鱗次輓輸芟芻既備器械畢集銳氣載揚就經會同童

總兵督發各新舊土漢官兵於肆月二十一日齊劄河渡
蒙巡按貴州監察宋御史牌申飭將領招納降民以分賊
勢不得殺降冒功致干天和等因遵行間蒙撫院行委
威清叅政王邦俊前赴河渡督發糧運童總兵將新募銅
仁陳邦揚等原挑選廣西親兵陳大縉等共八百名交發
徐都司督童龍部領會哨進剿時賊首爲提調張守欽袁
五受阿萬龔堂王廷燿同已獲男王承受等嘯聚長箐萬
丈林等處職秋同大監都司戴守禮量帶家丁馳抵烏江
哨出刀靶水狼飛渡直抵播州海龍壩隨據水西把事王
嘉猷將前報奪復烏江生擒苗頭阿訥阿利并楊首安弟

何惟富等肆拾壹名鎮雄把事陳阿宦將奪復烏江生擒
苗賊麻老虎阿倫等九名苗頭首級六顆俱經審驗申解
訖餘級未解又據安疆臣報稱三月二十二日漢把劉景
貴陳阿九等招撫過隴都猴場把事石盡忠等壹百零柒
房同日漢把羅一龍陳應龍同協捕指揮白璋等招撫過
高坡箐張王壩苗頭阿滿鄆承爵等六百三十二房又據
報四月十五日頭目阿卜者遮勒進克海雲圍殺賊一十
三名招降民二千二百餘房又差日把魏良海胡文魁阿
戎等領兵進攻泥壩苦竹養雞等圍殺守圍苗賊二十四
名招降民葉善等二千八百餘房拜川江客民九百餘房

賊龍原虜草塘司官民四百二十七房俱安插鄰近地方免亂兵殘害等情賊級未見解報隨准童總兵張都司手本報據泗城土官岑紹勳報稱奉令攻復河渡關協擒賊因二十六日寅時至河渡西岸該本州應襲岑雲漢同督兵指揮李懋標督陣官胡邦奇龍英州應襲趙政立思明府等目兵併力奮擊當陣斬獲四十三顆招撫過降民梁雲等一百二十九名口安插洪邊地方又准徐都司手本報稱二十六日督率把總羅寵等招撫過賊黨王雲等一千四百三十七名口安插瓮耳大山凉水等地方又准徐都司手本報稱五月初二日督把總土同知羅寵楊遇春

徐大綬等生擒賊首龔堂苗頭謝友貴潘廷貴楊承祖坐寨頭目黎民倫董三苗賊尚阿蘭并董三家人等共六名首從共拾貳名首級一顆招撫過賊黨康五元彭一等五百五十五名口又准張都司手本報據泗城土官岑紹勳指揮李懋標於初十日督兵剿捕長箐生擒偽提調賊首張守欽一名從賊一名斬級二十三顆十一日泗城官男岑雲漢督兵於清潭攻打洞口生擒賊首袁五受提調王廷耀男王承受從賊八名斬級二十顆招撫殘賊宋荣甘茂王積脉等男婦二千四百七十二名口安插雷水長山地方又據鎮雄把事李萬年報稱萬年等接護左監軍渡

烏江進播哨至石子了賊伏深箐突出拒敵該陳阿宦督
兵截殺斬獲賊級一十七顆次日護至牽狗洞賊放箭拒
殺官等斬獲賊級二顆生擒賊從一名戴都司督家丁生
擒四名指揮羅萬善斬賊級一顆就於長溪劄營處所解
監軍審驗轉解訖又據安疆臣龐澄報稱官兵屯劄養馬
城關口攻打前門鐵柱關大路該司府分撥頭目魁阿等
砍伐後圍箐林梯山攀崖探尋小路三十餘里直抵海龍
圍後賊見我兵劄近肩背連日出城衝殺我兵合永寧官
兵自左槽開路進抵後箐山頂營前貳土山係賊樵汲咽
喉賊屯勁兵拒守蒙左監軍同畢節道懸賞五月初九日

四更結束二職同督陣官劉孟銑王安民羅萬善等乘霧
抄賊營後黎明攻擊賊擁衆死戰該頭目覺巴等奮死殺
賊不計從寅至未方將賊兵衝退占奪二山職兵劄右曹
副總兵劄左陣亡阿白等拾五名中傷烏鮮等三百餘兵
本月二十四日總兵李應祥接管印務督率烏江河渡等
兵又蒙雲南撫院行委叅將盧承爵督募兵前來該職
寅秋督發徐都司帶領烏銃火器手一千五百名童龍帶
領安時泰陳邦揚等兵一千名泗城龍英等土兵六千五
百餘名合水西鎮雄營同劄後圍節奉憲令各道鎮克日
輪攻後圍因各路占據已定無處屯劄會營中流言四布

該職寅秋會同洪副使宣諭水西鎮雄將所刊通奪占右槽山坡一帶營盤盡讓官兵屯劄各官目於二十八日自願遠嫌移出海龍壩口把截立刻移行川貴劉總兵李總兵各先後督所部兵到圍六月初四日三省道鎮共議總兵劉綎李應祥於初五日總兵陳璘吳廣於初六日各照期分打劉李二總兵合哨分左右信地劉總兵攻土城門以左李總兵攻土城門以右該職寅秋會同李總兵右監軍叅議張存意副使尤錫類將右路信地分撥三枝以都司徐成督河渡哨守備音龍領廣西把總陳邦揚陳大縉雲南把總署守備事陳用實安時泰等兵平越哨副將陳

寅等哨下把總劉恩安世珍吳國輔孫之龔等兵奪鳳凰嘴由右嶺進都司張秉忠督平越哨把總華統薛應時等兵由左嶺進領河渡哨泗城龍英等土六於圍右崖壁截殺都司戴守禮督河渡哨把總牙廷相操守指揮馬化麟各銃手家丁平越哨把總張奇盛吳文秀等兵由中嶺進督安疆臣隴澄分兵於海龍壩泥圍等處截賊衝突奔逸先該都司徐成守備童龍會同副將陳寅議得鳳凰嘴峭險賊兵屯據死守必須衝鋒奪占鳳嘴山頂先得地勢方可攻取土城該三道即發懸賞銀二百兩分給各兵初五日五鼓會同劉總兵各照畫地齊攻賊抵死在於鳳嘴拒

黑州 卷之五
敵黎明我兵奮呼一湧衝殺賊兵奔潰退走土城內我兵乘高頂大銃鳥銃火箭火磚俯瞰齊發賊立脚不住登時攻倒土城一面拆卸一面打開土城內排柵敵樓賊據月城矢石如雨職寅秋同李總兵立枹鼓對山拔刀麾兵前進退縮者立斬鏖戰至巳未緣城接梯高招先登各兵用肩頂城上先登者手挽魚貫而上河渡哨陳邦揚親斬十三枝冠帶管事藍鳳鳴首級一顆中軍指揮羅萬善親斬何提調男何訓首級一顆當係投降偽內官葉正陽識認賊從首級四十七顆當陣奪獲百子銃一門賊奔崖墜死及銃死不及找級者不計其數將月城拆倒將土城月城

樓同劉總兵即時放火燒燬賊奔入大城死敵自午至申應龍父子親領首披堅出城衝突三次每次我兵用佛郎機百子銃等項直對城門齊打賊被傷退回天晚兵已疲饑三道再懸犒賞各兵歡躍齊心就於月城劄守舉放號火銃砲道鎮露坐嚴警賊兵膽落在城叫噉乞降至次日黎明陳吳二總兵照依分定日期接攻賊倒戈奔潰如蟻各路兵一齊登城擁入內城賊酋楊應龍將臥房發火同愛妾縊死要得自焚時五路總兵官齊圍賊衙賊妻田氏男楊以棟妻田氏楊良棟妻田氏楊奇棟楊勝棟妻田氏賊女貞惠貞瑞貞福楊朝棟妻田氏子松壽春壽女性福

賊首何漢良田一鵬子六老同爲內官使女一時拏獲五
路道鎮將賊屍擡至城樓喚伊妻男五司奏民同驗真的
俘獲賊親屬公同點明收繫城樓宣慰司印田氏攜帶在
身驗交陳總兵暫行收執續獲賊男楊朝棟楊惟棟俱見
在聽解各該有名賊首除斬級外河渡沙溪生擒賊從弟
管九族錢糧十二路督軍總管楊兆麟爲提調聶璽彭永
壽爲內官張元趙天瑞主謀走差探聽向問遣今逃回文
之宗即文章連前獲大提調尚意坐寨頭目夏文茂張守
欽袁五受龔堂等共九名投降爲內官葉正陽馮元宦張
元趙添瑞四名節該領兵官將擒斬賊首從移解前來審

驗轉解兩院轉行按察司審驗去後計前後徐都司部領
童龍等兵共斬獲首從賊級二百七十九顆生擒賊首從
七十九名招降二千三百三十名口俘獲賊屬二百零三
名口張都司部領泗城龍英等兵共斬獲首從賊級七百
七十六顆生擒賊首從二十八名招降七百四十名口俘
獲賊屬五十七名口戴都司部領馬化麟家丁等兵共斬
獲首從賊級四十二顆生擒四名俘獲賊屬七名口通計
河渡烏江一路共斬級一千一百四十四顆生擒共一百
一十九名招降三千七十名口俘獲二百六十七名口又
據安疆臣隴澄報稱奉令把截海龍壩口初六日惡苗奔

突衝出泥壩圍等路該職督率目把陳恩王嘉猷柯阿箇等奮勇截殺生擒苗賊王貴等一百零七名俘獲苗婦十口初七日賊伏箐奔出目把周愷陳恩等生擒苗賊播賊除審放外實六十三名俘獲賊屬四十一名口又據呈報奉左監軍密諭緝拏原殺綦江房遊擊兇犯馬騰漢及賞格有名播黨解報該目把阿石陳德擒獲馬騰漢又目把丁良茂李元玉等擒拏賞格有名大提調陳大恩門子王邦紹即王邦兆該本道先後轉解兩院轉發按察司訖又據報稱前後招出龍安水提調鍾祿馬院提調朱鶴管獵提調朱鵬馬坎坐寨陳大富雖係投降原是有名賊首不

敢隱匿又招出管事偽內官丁朝元管板山圍偽內官劉元管泥壩圍偽內官葉善元俱原悔罪投降但係淨身男子非土司敢用等情先將鍾祿丁朝元劉元葉善元具解前來隨奉督撫憲牌行查賊子楊惟棟前報斬級今何擒獲見在隨據安疆臣呈稱大水田奮勇殺賊萬餘賊首約五十餘名內一名少年裝束迥異軍中有認係賊子惟棟時未敢信飛報院道文內待查的又報次日擒獲馬兵何老供少年被殺者係賊第四子惟棟押發賊屍枕籍中辨驗據執相同方行找級同何老并解院道審供一口後左監軍圍下招降偽內官葉正陽供報死大水田者的係首

親信門子何元保狀貌裝束俱與惟棟一樣時欲檢舉尋
因困破今何老見監可審原報見案可查抑或天氣炎蒸
屍變亦係何老悞認竝非欺蔽等情通計前後斬關破圍
除夷俗原不割級者無憑查覈外共已解驗賊級一百七
十二顆已解驗生擒賊首從三百五十四名招降八千六
百八十六房共三萬餘名口又據畢節道移稱初六日本
道隨營督兵指揮徐懋功千戶左堯臣把總許成名等各
領隨營親兵於濫泥毛坪把截初六日賊苗衝出各兵奮
勇生擒苗賊三十五名內偽長官一名趙鳳儀搜出前朝
賞功勅命一道賊級二十三顆又據中軍劉岳報稱督

率隴澄兵於海龍壩口把截同親兵斬獲二十六顆解赴
李總兵移行紀功陳知州就近審驗外通計河渡烏江沙
溪共斬級一千三百六十六顆生擒賊首從四百七十三
名招降共三萬三千七十名口俘獲二百六十七名口除
生擒首賊分別應獻俘應梟示俱審供吐真確斬獲首
從賊級俱辨認的實試驗明白招降暫於附近地方安插
事定議復俘獲變價入官係被虜者查發親屬領回另造
冊報外該本道會同紀功按察司按察使易登瀛畢節道
副使洪澄源布政司左叅政王邦俊左叅議梅國樓看得
楊首逆節滔天提封據險不下千里而遙而迫近黔省烏

江河渡之間八十里而近我一投足即害地彼一鼓翼即
壓境兵分則衆寡不敵不分則咽喉不守不進見為示怯
進則苦於寡援方賊之併力一向阨我為江河渡之師也
人疑不釋於安兵賴督撫軍門審勢決策震疊鼓舞安其
心而作其氣遂有大水田之捷首摧賊鋒方兩關之既克
不守也人謂解嚴之後不復鼓行而西矣賴督撫軍門徵
兵厲甲獎率新舊之兵決命賈勇載渡險關猶能執訊獲
醜從諸路深入賊阻方水西安兵之遠嫌拔營移劄也人
謂安兵解而河渡之孤壘不得圍陳合圍電擊矣賴督撫
軍門焦勞主持以威信制夷命以輪攻申軍令以懸賞勵

士心六月初五日黔兵得合川東碁南哨齊驅先登一鼓
而奪鳳凰嘴再鼓而克土城月城質明賊不戰倒戈遂平
兇逆救萬靈之塗炭拓千里之封疆繫絲 天授夫豈人
謀等因又據右監軍右叅議張存意呈稱平越哨未奉師
期之先適遭東坡刦殺之慘興隆偏橋平清之間官道不
通者三月該本道會同帶管守巡道尤副使遵軍門密令
集兵大剿掃蕩黃飄臺蠟平崖等寨火其居掘其穴斬獲
雖無多級奔遁殆靡遺種軍民稍稍樂業道路漸漸肅清
僉謂此一舉也當為黔中首功則叅將劉效節調度於城
中守備伍萬鍾汪如淵土官蒙詔把總張鶴翀各率所部

官兵鼓舞於當陣而先鋒衝敵所向無前在水西把目王嘉猷張崑領羅兵一千名功尤表表至今未蒙敘錄公論缺然及奉督撫分布一路由興黃直掃白泥草塘等處一路由平越牛場乾溪乾坪直掃四牌等處自二月十二日起至本月終止我兵漸進賊亦漸退搜山擒斬俱屬零星驗明冊載外首記其發軔開鋒之勞則三月初二等日副總兵陳寅統領土官蒙詔土舍莫勞中軍官孫仲謨督陣官楊守乾李繼晟家丁陳定等有漩水圍之克為事官蔡兆吉統領土舍楊治隆土官張元虎把總猶鶴安生等有天邦圍之克原任守備伍萬鍾統領把總呂守現李正中

阿亮等繼以百戶李師沆中軍官張奇盛率領把總華統吳文秀宋世臣汪世才等前後夾攻有三百落圍之克通共斬獲賊級二百一十五顆俘獲賊屬一十七名口賊仗器械五十三件而都清守備汪如淵劄兵清池令把總張鶴翀許攀龍等帶兵搜山直抵四牌草塘松坪招出播民楊世祿等携家二十九名口出降令充鄉導報效以上俱於三月初陸等日呈報訖次述其兼勝長驅之績則三月初七等日副總兵陳寅統率土官蒙詔舍把莫勞家丁陳定同守備汪如淵等漢土官兵拒賊於四牌高圍之下坐營守備柳國柱中軍張奇盛統率把總吳文秀百戶李師

沉等兵由後路把總華統宋世臣朱運昌千戶張翀等兵
由前路與陳寅部兵策應偷攻於四牌高圍之上為事官
蔡兆吉統率土舍楊治隆土官張元虎張蘭把總猶鶴楊
通霑安字戎茂才同督陣官馮伏繼以守備伍萬鍾統率
土官楊燧把總呂守現呂廷祿葉逢春等由小路攀崖放
銃直掃龍水圍之穴通共斬獲賊級一百六十二顆并賊
仗八十三件而蔡兆吉復令把總猶鶴等督兵於十二日
黎明抵青岡圍攻打共獲賊級二百二十三顆生擒謝王
保等二十六名俘獲賊屬男女七十八名口奪獲器仗二
百三十一件并被虜男婦六口以上俱於三月十七等日

呈報訖至是而軍聲已大振矣所限者長河一帶之水耳
深潭斗岸賊衆堅拒非船筏不得渡非火器不能抵時則
李總兵親督中軍張奇盛百戶李師沉治河駕三眼百子
鳥銃對岸放打責令造船指揮邵元爵協造土官金世忠
并差指揮周宗堯曹選星夜刻期催到船隻繩纜分發各
渡頭於是副總兵陳寅先令中軍孫仲謨土舍楊治隆等
黑夜引南丹等兵偷渡構皮灘潛伏山後以為策應乃親
領把總家丁陳定等由袁家渡守備伍萬鍾汪如淵領千
戶李朝陽把總張希軫杜廷武汪世才督陣官高連等兵
由疆界河為事官蔡兆吉領把總猶鶴等兵由吳歪孫家

二渡各浮水搭橋奮勇登岸首尾剗通共斬獲賊級二百二十九顆俘獲賊屬一百二十三名奪獲賊仗九十二件諸葛銅鼓二面奪回被虜男婦一十七名口此皆三月二十一日以前事而長江不守乞降者頗多該本道會同李總兵揭旗招撫戒勿妄殺惟時為事官蔡兆吉先納巨賊李得祿等獻船二隻以為先聲而男婦六百八十二名口降守備伍萬鍾責差把總薛應時等嚴禁需索而男婦九百零六名口降守備汪如淵招致地里壩李彪等宣諭恩信而男婦二百三十六名口降其餘牛馬器械家夥等物不計悉陸續發內地安插此收拾江外之大槩也至是

而賊膽已半寒矣所恃者黃灘千仞之關耳層崖壁立賊眾死據非鄉導不能入非掩襲不能取時則李總兵傳令副總兵陳寅中軍孫仲謨等揭示免死令票并報效賞格招出虜民蕭仁德唐榮智等計擒白泥土官楊正邊楊通漢父子並其妻子三百餘名口及本國男婦共九百一十三名口於是副總兵陳寅統率百戶李師沅中軍官張奇盛納級指揮李世培把總張希軫杜廷武張世敬易之謙土官楊燧監軍督兵二道督陣指揮周宗堯曹選何昂臣張體仁千戶張翀陳志道把總劉朝臣劉承胄李邦舉彭夢龍等攻其關之前用新降石勝鳳王志龍王志虎王賓

王倫尚習中及播民王其質從墳林暗渡襲其關之後生擒首惡王大安王愛追至張王壩盡掃其關之左右羽翼收兵堅壁立營固守通共斬獲賊級八百伍十六名顆奪獲賊屬牛馬被虜男婦器仗不計此四月十二日以前事而險關既潰乞降者益衆該本道會准李總兵委官宣令坐寨安撫惟時為事官蔡兆吉以招到夷民丘伯芝徐受等一百八十八名報降頭石勝鳳以撫過虜民老鷹圍萬餘名報其餘牛馬器械家夥等物不計陸續半發內地半仍本地安插此收拾江內之大槩也嗣是江外關內之險既失而賊勢已弱三省七路之師並進而賊計益窮惟有脅

叛苗携妻子退據海龍岡而已彼其數年精力用之一圍前後重關左右深谷將自謂負隅之虎莫可誰何而督撫嚴觀望之誅官軍矢必克之志以五月五日檇巢六月六日滅賊惟時攻守後關則副總兵陳寅守備伍萬鍾督同紅旗官楊守乾中軍張奇盛指揮李世培加級指揮張世敬把總張鶴狎吳文秀宋世臣李茂春陳汝栢等預備攻具勉竭攻力而都司徐成戴守禮遊擊張秉忠則又臨時鼓勇驅率官軍先登者也攻打前關則副總兵陳寅都司莊志傳守備伍萬鍾統率指揮徐登階把總張希軫為首杜廷武呂守現呂廷祿金世隆劉朝臣劉承胄等為從直

上層樓縱火燒燬而為事官蔡兆吉守備汪如淵千百戶
李師沆李朝陽陳志道段必明王民皞督率把總徐用賓
孫應祥王朝朱朝岳楊正行李邦舉等則又把截要路立
禦賊黨衝突者也計圍前後斬獲賊級一千一百一十顆
生擒首賊楊兆麟阿萬并收獲昌田驛驛印一顆長官
勅命一道俘獲賊屬三百二十六名口賊益窘急舉火自
焚縊死牖下火未及身而完屍已為我兵所獲并收其妻
子家屬驗明押解則在事將領官兵人人畢力用命而大
功於是乎告竣矣自出師之日起至破圍之日止前後通
共斬獲賊級三千五百八十四顆生擒首從賊七十名招

降播民共一萬八千五百四十五名口俘獲賊屬五百九
十八名口奪獲賊仗兇器一千一百二十四件又查得思
石一哨以龍泉為咽喉以焚蜀為犄角方三省之兵馬未
集孤城之防守不支逆賊之窺伺更劇其勢誠定安乎殆
矣自首惡趙仕登為曾文學梁廷祿等所誅而義聲稍振
則都司錢中選之密謀也自土官安民志以身與妻子死
賊而軍威復挫則守備楊惟中之溺職也迨夫王師分
布之後各有零星擒斬之蹟俱經冊載外紀其大者三月
十五日該指揮胡効忠蔣崇賢率千把總劉廷俸唐顯威
李佑哨長曾朝舉等攻打革羅水青龍黃沙圍斬級一十

六顆生擒二名十六日該指揮蔣崇賢率千把總楊廷耀
李明龍許從龍梁廷祿李廷機黎廷官百戶薛瑞等攻打
餘溪庄斬級三十三顆擒獲從賊一名此則我兵發軔宣
威之一奇也而其餘伏路搜獲零功亦附焉三月十八日
該把總李冠李君寶陳効忠等率兵打盤脚圍斬級二十
顆奪回婦女三口十九日千把總周世祿戴天球李君寶
率兵打保子圍斬級二十八顆此則我兵長驅漸進之一
奇也而其餘伏路搜獲零功不與焉四月初十日該守備
徐允爵部下把總陳光大操高第王嘉彥等率兵打真武
圍羅家坪等處斬級八顆生擒一名此則我兵乘勝深入

之一奇也而其餘伏路搜獲零功亦附焉自是為直擣關
內與楚兵合為一哨矣時惟四月十一十二十三等日攻
打趙生長坎等圍斬獲首級共肆百八十三顆則楚將指
揮徐時達劉自西黔將蔣崇賢中軍官葉定遠領兵千戶
把總張夢麟黃明儒周世祿楊騰龍李佑薛瑞朱蓋臣李
廷芳許從龍陸希管田應瑚梁廷祿等之功居多而同日
指揮胡效忠把總楊昌連等攻羅安水斬級八顆十四日
指揮蔣崇賢把總李佑李廷芳等攻青蛇圍後山斬級二
十五顆以及十五十六日把總陸希管於青蛇圍後山斬
級三顆其功雖微亦有足述者也四月十八十九二十二

十二等日攻青山圍五鳳庄小三渡關攔牛坎野苗圍并
青山圍後等巢七起擒斬首級一百四十五顆則指揮胡
効忠蔣崇賢中軍葉定遠千把總張夢麟李佑薛瑞楊昌
連李廷芳葉占先王國臣宋受隆越其進等之功居多而
二十四日守備徐允爵把總冉維鎮等克懸崖等處斬級
四十八顆二十五日把總王和民等擒斬首級四名顆二
十六日中軍葉定遠等復攻牛坎鴿子岔擒斬首級一十
一顆二十七日守備徐允爵把總田建邦操高第等復攻
五鳳羅安水等巢斬級五十八顆五月初一日指揮劉自
西把總丁慶等攻青水橋賊巢擒斬功級一十五顆指揮胡

効忠遣兵出哨生擒二名指揮蔣崇賢遣兵出哨斬級二
顆亦應併錄者也自是而直隸白田壩與三省七路合為
一圍矣六月初五日該指揮蔣崇賢張拱極統率各兵於
海龍圍後截殺斬級三十二顆而千把總薛瑞李佑楊廷
耀朱蓋臣越其進王嘉言王國賓以及武生錢之禎錢之
祺韓希奇越崇功等亦均效勤勞者也六月初六日守備
徐允爵指揮徐時達蔣崇賢劉自西覃宗伊張拱極督兵
齊進海龍圍上截殺擒斬功級一百七十四名顆而千把
總薛瑞朱蓋臣許從龍李廷芳越其進王嘉言黃明儒楊
騰龍以及千百戶應襲胡來觀鄆民悅武生越崇功等亦

在效勤勞者也至於大兵齊入賊宅共獲元兇尸首并收其妻子家屬驗解則本哨將領官兵咸在而最後初八日中軍葉定遠復於圍後深箐斬級十顆例得併錄於冊以上思石哨除楚兵楚將擒斬功次聽楚中監軍督兵道查敘外所有黔中兵將總計斬獲首從賊級通共九百一十三顆生擒三十七名俘獲賊屬三百名口招撫出播民一萬零三百二十九名口奪獲賊仗兇器三百二十三件等因冊報到臣又准總兵官李應祥及據紀功各司道冊報相同除龍泉一路係楚將楚兵者聽偏沅撫臣敘報外案照萬曆二十七年閏肆月內准兵部咨為狡酋殘暴無忌糾

苗殺虜防禦官兵等事該本部題覆奉 聖旨楊應龍輒

敢糾苗殺官好生悖逆可惡著即催督撫李化龍郭子章

及劉綎著遵旨一併星馳到任調兵進剿不許延緩滋亂

餘俱依擬行欽此本月二十八日准兵部咨為播苗大殺

官兵飛報緊急軍情等事又為土酋糾苗數萬圍殺官兵

勢已披猖幾不可制乞勅 新命督撫諸臣星馳赴任等

事該本部覆奉 聖旨是這叛苗圍劫事情著該巡按嚴

勘具奏李化龍并郭子章你部裏馬上差人催他到任俱

限於五月內接管行事劉綎也著再催先帶家丁馳赴四

川俱不許任情延緩致悞軍機其餘應該區處的上緊酌

議來行欽此萬曆二十八年二月二十七日准戶部咨為
播寇突出充斥興隆黃平之間等事該本部題覆奉 聖
旨是貴州孤懸著總督將供餉銀兩先儘支發仍遵前旨
於鄰省堪動錢糧內先動後題逆酋抗亂普天同讎各省
直官宜請助兵餉豈得托言違旨支吾推諉著通行與他
每知道欽此本年三月十三日准兵部咨為播賊分道突
犯全黔勢甚阡危等事該本部題覆奉 聖旨貴州孤危
著總督上緊與各鎮撫應援兵馬若少准再酌量調募另
給糧餉與他廣西雲南湖南廣各兵俱要齊赴信地戰守不
許逗遛觀望童元鎮堪否策勵及應拏應換總督務遵照

屢旨及今部覆從實行不得姑息陳寅等若再不到叅來
重處朝廷不中制該督撫宜協心力任相機行事欽此本
年三月十三日准戶部咨同前事該本部題覆奉 聖旨
是糧餉用兵緊務難待奏報輾轉鄰省應解的著總督遵
照屢旨嚴行催取該撫按不許執留短少致悞軍機以後
不敷任總督便宜徵發借助不必一一奏請仍先儘貴州
免令告匱若有抗違不遵的指名叅來處治欽此本年三
月十三日准戶部咨為暫留起解錢糧抵給貴州萬分緊
急軍需事該本部題覆奉 聖旨這銀兩著雲南解貴州
充餉仍著按括設處務足題定數目解去不得再行奏擾

欽此本年六月二十九日准吏部咨為播賊殘破孤懸土
司尋復歸巢謹據實查叅失事將官以肅軍政事該本部
題覆奉 聖旨貴州兵事方啟郭子章著照舊供職上緊
剿賊欽此本年七月十二日准戶部咨為黔師報捷滅賊
有期諸路未齊糧餉不繼懇乞 嚴旨急集兵糧議殊賞
以收全勝事該本部題覆奉 聖旨是滅賊有期需餉尤
急你部裏速行與各該巡撫官將屢經奏旨助黔銀兩上
緊定限解去毋得託辭怠緩誤事欽此節准兵部差叅將
朱鶴齡都司孫繼祖解到太僕寺餉銀六萬兩南京戶部
差主事唐斯盛汪若冰解到餉銀拾萬兩川湖貴督臣李

差官解到餉銀一十二萬二千六十餘兩雲南撫臣
陳 差官解到餉銀一十萬四千兩遣守備童龍等助
兵萬餘而親駐曲靖以為聲援兩廣督臣戴 廣西撫臣
楊 差官解到餉銀三十八萬兩助兵二萬餘而遣都司
莊志傳等為之督率湖廣撫臣 差官解到餉銀五
萬兩河南撫臣 差官解到餉銀九萬兩福建撫臣
 差官解到餉銀一十萬兩江西撫臣 差官
解到餉銀三千三百餘兩直隸應天撫臣陳 差官解
到餉銀一千九百五十餘兩今據前因該臣會同總督川
湖貴州軍務兼理糧餉巡撫四川地方兵部右侍郎兼都

察院右僉都御史李

看得逆首楊應龍者浮竹遺孽

沉木餘兇四境盡屬

王土百姓久入版圖乃其敢於稱

亂而尤輕於犯黔者有三一恃地險烏江黃灘板角等關

俱與黔鄰喬林挿月崇巖隱天疊嶂復嶺猝難攻拔一恃

苗悍黔所在皆苗九股紫江紅苗黑苗賊擇其鷙者妻以

七姓婦女予以五司腴田刻為鐵契名曰虎兵恩若父子

猝難解散一恃黨衆腹心爪牙實繁有徒充斥貴陽伺我

虛實亦有民黠得其金錢出死力為內應猝難譏察而臣

自聞命入黔以來其不足恃者有五清藩司之金僅止

肆千括通省之帑不滿五千是無米之炊也金不足恃標

下兵僅五百餘合一省兵不過三千是無刃之戟也兵不

足恃貴陽距播二百餘里賊一日夕可至而又無長江天

塹以限之嚴城堅壁以禦之是裸裎當虎口也險不足恃

硝磺出於楚銅鐵產於滇道路險遠不能應手是張空卷

下鷺也械不足恃山箐滿目田畝幾何而又舟航不通於

龍灘輿馬交頓於鳥道兵稍鱗集無處運米是令三軍日

呼庚癸也糗不足恃賊所恃若彼臣所不足恃若此以故

逆膽大於身殘性猛於虎始犯飛練次犯東坡又次犯龍

泉又次犯烏江詐為乞憐實則搖尾假名辯寃翻成吠堯

一時海內臣工僉為臣危即臣自顧將不知死所矣仰荷

皇上發赫斯之怒授必剿之符臣請兵即予之兵請餉即予之餉已又俞輔臣請罷黔中監稅之疏已又俞部臣科臣協濟黔中兵餉之請皇威震疊下神兵於九天聖謨深潛決睿筭於萬里密勿輔臣弼贊廟略必克敵以尊朝廷筦樞司馬指授機宜不以賊而遺君父計部百道轉輸頓令貧弱變為富強科臣屢疏指示遂使犬羊失其險阻以故文武將吏齊心協力人百其勇士一厥心而逆首猶據如掌之地延翹足之項竟於六月初五初六日共集堂堂之陣用成善善之功賊首投繯遂醢其尸妻子為虜靡有孑遺乃知丹浦綠林之險果不足恃長蛇狡兔之黨果不足憑天地合謀鬼神助順豈臣等區區庸謏智力所能辦哉一時同事疆場如總督右侍郎兼都察院右僉都御史李聲名燭於冰天忠義貫於霜日遼左逐虜不求紙上之孫吳夜即平夷自有胸中之方虎論功當銘麟閣紀石不讓燕然湖廣撫臣談兵凜凜挺節巖巖毆去蚊蟲之羣已張先勢擣空狐兔之穴即紀雋功豈獨三楚覆孟頓令八番安堵偏沅撫臣江韜鈴在宵勲勞奕世卒探虎穴皆猶枕席上之安師出龍泉胥賴帷幄中之畫即偏沅已在其覆露而全黔且潤於餘波巡按貴州監察御史宋激揚夙懋弘猷謀

餘中

斷允資勝筭威令則火炎雷疾壯士氣於前茅籌畫則鑑
空衡平振皇靈於破竹凡此將士之效命皆由憲紀之肅
昭兩廣督臣戴雲南撫臣陳廣西撫臣楊江西
撫臣夏福建撫臣金河南撫臣曾應天撫
臣陳興同舟共濟之懷篤輔車相倚之義志在馬牛之
歸放誓將梟獍以掃除犄角則或多出兵或少出兵不以秦
越而異視饋餉則或以舟載或以車載宛如手足之相扶諸
臣與臣聯事封疆寔多弘濟弟共爲憲臣爰遵明例不
敢僭敘外其總兵監軍司道副總參遊并督陣登先斬馘
各官謹逐一甄別而具列之貴州總兵官都督同知李應

祥勇冠三軍籌運下里黃灘決渡已奮鳴劍抵掌之雄海
龍拔城遂收犁庭擣穴之績此一臣者縮全黔之卒徒司
漢夷之命脉論功相應首敘以膺特簡者也左監軍按
察使楊寅秋沉潜熟慮桔据苦心擊楫烏江有百折不回
之勇援枹險圉真八面受敵之才右監軍右參議張存意
手抉盤錯腹滿精神憤逆賊之縱橫誓平蟻穴激將士以
義勇竟落梟巢以上二臣久勞營中躬跋圉下功宜首論
而楊寅秋操縱羅夷備嘗艱辛後圉之勞績更懋張存意
出入巖谷間關險阻前圉之首功最多相應特加超陞重
賚仍需大用者也督兵副使尤錫類忠誠許國謀略出

人守平越六城頓令生苗破膽拔黃灘三砦坐收西賊游
魂督兵副使洪澄源厚德鎮浮正氣邁俗駕馭羅甸如迅
雷之激清風馳驟山林若輕車之就熟路糧道左叅政郭
廷良風力强敏心計周詳總列郡以餉屯如身心之運臂
指驅千騎而飛輓若子弟之從父兄餉道左叅議梅國樓
萬竈連營一心幹國出緡於帑已足陳陳相因之需峙
粟於倉竟成多多益辦之助以上四臣功應竝論而尤錫
類洪澄源投足國崖之險馳驅行久郭廷良梅國樓愁腸
米鹽之細籌筭坐煎相應陞級重賚以酬勞勩者也督兵
副使路雲龍精神折衝謀猷戡亂忠信篤敬蠻貊之邦以

行禮樂詩書犬羊之氣自奪紀功督餉副使陳與相卓犖
通才權竒俊識弘猷應變措思石於丘山敏手撥煩弄播
苗於股掌右叅議張文竒守郡則棠陰路滿出鎮則驪駕
功高罷精力於轉輸盜辭跋涉歷紛難於樽俎益展謨謀
河渡督餉左叅政王邦俊古貌古心實行實政籌邊遼左
歷多年而塵清腥膻餉兵黔陽無幾時而威震草木都勻
督餉副使袁應文秉心諒直臨政方嚴始督運於都勻貌
貅宿飽後稽功於平越涇渭鑑明原任右叅議今降調梁
銓見事風生當機刃解雖遲回道路或少纓冠之雄而却
賊興隆實賴金城之勢以上陸臣相應優敘竝賚而路雲

龍陳與相獨當一面張文奇將漕三楚相應陞俸梁銓保
障興隆雖經降調亦當併敘者也總餉左布政使應存卓
地望如山門庭似水縮舊新之軍餉無煩木牛覈文武之
戰功總歸冰鑑紀功按察使易登瀛貞姿勁質鐵腸石心
功罪攸明燭照數計而龜卜號令不撓雷轟電掣而風行
以上二臣總一省之糧餉查各路之功級且共守會城分
督保兵勞績懋著應從優賚紀錄者也興隆副總兵陳寅
智能料敵勇可摧兇東乘長風則島奴釁鼓西樹赤幟則
夜即焚旗龍泉副總兵陳良珙勇略卓冠一路才藝足了
十人連破險關而勢成解籜頻誅劇賊而功咏采薇畢節

參將朱鶴齡坐籌可折遐衝指麾儘閑方略輸軍興竟逼
敵壘督夷兵終馳捷書原任遊擊今起貴州都司徐成間
關百戰夷險一心鳳嘴首登才推萬人之傑龍圖旋拔望
在諸將之先都司錢中選奇骨昂藏每勵討賊之志巧板
精絕克全敵愾之威大盜都司戴守禮鳴弦邊鄙橫戈夜
即攻險圉不避艱辛梭箚寇屢有斬獲廣西都司莊志傳
枕轡閩海說劔轅門董西粵之兵以長驅望且蘭之城而
直搗以上七臣提兵深入協攻險圉俱應陞賚內陳寅謀
勇無雙堪膺登壇之選徐成先登第一應以原任遊擊加
陞當一面之寄者也掌印都司王納忠脩城編保壯省會

金湯之固繕械除戎增營壘批擣之雄守備杜鶴鳴能讀
漢書兼解墨守疏捕不替夙宵偵邏更嚴斥堠以上二臣
馘級未效疆場乘障有裨刁斗內王納忠應加優賚杜鶴
鳴同加賞賚者也原任守備今督滇兵童龍赳赳鷹揚桓
桓驍勇塗甲冒火一日而拔月城摧敵折衝三戰而入虎
穴都清守備汪如淵英爽有爲驍雄孔武守興隆堅壁不
動掃四牌鼓行而前標下中軍署都指揮僉事劉岳志銳
策功令嚴督陣在虎帳可資籌略擣龍囤雅中縱擒原任
守備回衛指揮徐允爵技藝精練器宇魁梧破關已見封
丸攻圍不忘累革督兵把總署守備事陳用實偉貌昂霄

壯志投筆一清蛇豕之毒大海蜂蟻之羣貴州衛中所鎮
撫會舉葉定遠戈文耿耿馬足駸駸彎弧而兇黨膽寒揮
羽而妖徒瓦解以上六臣俱應陞賞內童龍摧寇鳳嘴相
應特陞以酬先登者也貴州都司張秉忠氣本邁羣志在
滅賊始雖垂翅河渡未塞虜旗後能奮翼海龍終技趙幟
雲南中軍官今陞遊擊張澍蹶而益奮敗乃爲功意慮因
百折而堅事變終一麾自定原任守備陞都司僉書今立
功官伍萬鍾膽氣鷹揚雄姿虎視昔雖失之偏鎮今能收
之桑榆爲事官蔡兆吉渡江恐後擣國直前幾年暫蹶霜
蹄此日應搏風翮此四臣者或爲前拒或佐後攻而張秉

忠張澍以河渡之失已經參論伍萬鍾以偏橋之失原行
立功相應以功議贖俱行獎賚內張秉忠功浮於過相應
厚賚伍萬鍾相應復職蔡兆吉拔自泥塗相應開伍復職
者也監紀雲南廣南府知府黃宇借寇五馬移餉八番嚴
紀覈二路服其元龜公欽散三軍倚爲都竈貴陽府同知
徐庭綬職縮芻粟而畫箸才優身爲金湯而枕戈志切思
南府同知張羽鴻轉輸甘風雨之衝出入忘荆榛之險貴
陽府推官張應選總兵儲足飽戍已之屯放軍興不挂庚
癸之慮思州府推官吳天祐當羽檄馳而不撓於豺狼及
首功覈而能分乎鹿馬貴陽府通判劉鳳儀能講度支之

策有資紅腐之儲鎮寧州知州李珪弩矢前驅而不畏
赤樵蘇後爨而坐觀突黔求寧州知州陳聖佐飛輓則畫
婉婉者居多紀功則才恢恢而益辦定番州知州王應昌
縮三刀割繁不媯餉千屯履險如夷普安州知州龍時躍
輪轉而三軍宿飽馳驅則百瘁忘疲施秉縣知縣袁尚紀
三楚甘泛舟之役萬竈均投醪之恩銅仁縣知縣陳廷範
芻飛粟輓而民自樂輸葶食薪眠而士忘罷露清平縣知
縣劉啓周紀驗每臨京觀查覈能辨蕭蘭新貴縣知縣龔
一慶首功之辨驗不爽饒道之絡繹如歸以上十四臣均
應厚賚內張應選李珪王應昌陳聖佐龍時躍袁尚紀陳

廷範俱在軍前勤勞最久仍應紀錄擢用龔一慶雖經黎平降調相應并敘者也鎮遠府知府張叔璽思南府知府陰鎔推官趙民說石阡府知府江至道都勻府知府鮑獻書推官楊應第駐鎮黃平四川重慶府通判羅應雲印江縣知縣張鎔婺川縣知縣葛楚元鎮遠縣知縣文嘉兆以上十臣或專城五馬或司庾一方雄論風生聚米而山川可料嘉謀電發奏刀而醜髀皆虛雖徵調餉兵鷲羽未閑於講上而折衝樽俎神鉉若躍於腰間相應竝資而知府張叔璽地當孔道拮据尤苦知府陰鎔賊犯龍泉支持甚艱尤當優眷者也烏江沙溪哨領兵官總督標下督陣指

揮郭示勳千戶王三錫百戶呂大業胡邦奇楊教姚可興軍門標下督兵官王安民千戶王真廣西督兵南寧衛指揮羅萬善伍屯所指揮李懋標南丹衛指揮康應麟桂林衛指揮霍世寵大寧操守指揮馬化麟南贛中軍指揮馮邦濟納級指揮黃運清廣西柳州千戶趙夢胤把總陳邦揚陳大縉安時恭牙廷相操守鄧廷卿鄧光宇丘富即張嘉震徐大綬章爾知王演李擒龍王學禮邵以讓梅調羹爲事官周易畢節衛指揮主于忠納級指揮徐懋功千戶張四端秦仕喬章甫王世臣左堯臣百戶林鳳舉王璽把總許成名陳潤平越哨總督標下督陣官楊守乾高連李

繼晟馮伏領兵官指揮曹選周宗堯張體仁何昂臣納級
指揮李世培千戶李朝陽張翀陳志道段必明百戶李師
沉王民皞把總張鶴翀孫仲謨張奇盛汪世才安世珍安
生呂守現李正中易之謙華統吳文秀許攀龍朱運昌戎
茂才安字葉逢春薛應時陳定劉恩鄭國明杜廷武李茂
春陳汝栢張世敬劉承胄劉朝臣呂廷祿張希軫李邦舉
彭夢龍徐用賓孫應祥王朝朱朝岳楊正行金世隆蔡繩
周思石哨領兵官指揮胡効忠蔣崇賢千戶王嘉言試百
戶越其進薛瑞把總李君寶黃明儒千總周世祿以上一
百零三員凌霜氣勁溢匣鋒雄麾白羽以臨戎明能燭敵

指黃電而對壘奮不顧身或山立軍前而志懷禦侮或肉
飛馬上而功收犁庭皆身歷行陣應特加優賚內把總陳
邦揚陳大縉先登鳳嘴厥功最奇張鶴翀久守黃平斬馘
功多效勞最久中軍羅萬善馮邦濟深入賊阻宣力最勤
李師沉少年驍捷署中軍獨繫王真千里赴援造火器獨
精康應麟鄧廷卿丘富即王學禮前守河渡力殿賊後仍
應通候覈實功次分別錄用者也軍門標下募兵官千戶
李春元百戶王弘業胡朝賢把總馬武卿劉崑買米官指
揮張世卿千戶傅良臣李東生把總王允聽宋真相買硝
磺官指揮張元勳百戶蕭鳳鳴陳良翰買魚鹽官指揮楊

祖禹千戶崔仕堯百戶鍾岐鳳造火器官指揮謝升階許
敬所馬逢樂百戶王曰賢護餉官指揮魯仲禮鎮撫張國
壯百戶魏國忠把總李國保旗牌官蕭時芳朱萬春印鎮
國白其心贊畫官王懋德王有聲張一龍鄒宗魯何世祿
葉天植朱應明王永年彭應祖湯承禹標下把總劉崙劉
岱白雲鵬李文學王見龍吳秉鉞李翔龍周明丁文明陳
文立陳鉞王國忠葉瑞梁鳳吟羅緯金重王守邦黎元德
袁備陳文德石安邦李逢元劉汝輔翁獻忠林監精蔣文
堂烏江哨運糧催夫官貴前二衛指揮楊師震李棟材夏
應龍陳尚策白璋烏撒衛指揮李國忠水盜衛指揮蘇通

赤水衛指揮許維垣畢節衛指揮朱承勳普定衛指揮許
應春普安衛指揮劉化龍安南衛指揮吳東俊千戶楊希
堯劉子爵鎮撫陳三德百戶魯師孔沈應麟煙夢堯王國
葵平越哨造船指揮邵元爵運糧指揮薛紹瑄金汝陵張
維美國柱趙清陳堯年婁聯璧高位郭維藩林起鳳常靖
國百戶冷壁趙之奇督兵防守施秉縣原任守備今革任
史良將思石哨防守思南指揮洪應選百戶周希舜羅國
器以上壹百零壹員名共擅英姿各懷雄志當貼危而形
勝壯鞏堞社於金湯精鍛鍊而戎器除利銛鋒於霜雪或
防賊險阻潛奪肘腋之姦或徵兵楚粵橫紓肺腸之憤雖

未身歷行陣均各效有勞績內蘇通署中軍料理繁劇楊師震李棟材握衛符供億樊苦夏應龍催餉偵賊張世卿市米辰常均應分別同加優賚而史良將防守施秉環縣皆苗一年無虞相應議贖者也婺川生員曾文學贊畫官生劉孟銑雲南贊畫官黃龔原任州同鄭文都司經歷劉苗前衛經歷李稠威清衛經歷何璉貴陽府經歷吳德潤安南衛經歷包一鳴畢節衛經歷黃熾赤水衛經歷李大賓原任京衛經歷曾學孔鎮遠府經歷劉澤興隆衛經歷唐咨禹清平衛經歷鄧邦文新添衛經歷方良知安順州判官周懋良吏目朱仁壽王致道朱權周之禎毛應瑞張

大紀晏啓魯有進恭世福唐以儉栗廷蘭王裕繆泮典史譚文嘉操簡驛丞盛文科武生張國揚共負脫囊之類恥爲轅下之駒或數馬移粟而程筭錙銖罔淆或除戎運器而什伍弩矢俱備赴死地如奔駑急公家若求亡以上三十四員勤勞惟均俱應併敘內曾文學首誅劇賊趙任登足寒賊膽例得陞級劉孟銑再入險阻亦冒矢石備嘗荼苦黃龔獨航單車萬里召募不辭劇易所當優敘者也宣慰使安疆臣報效成於感恩士宿飽馬騰槽殉封疆之急者數萬鎮雄府土知府隴澄忠勇激於慕義披荆棘冒鋒刃希馬革之蹤者半年雖海龍壩之移師未收賊於猗

角而大水田之麀戰實牽賊於腹心焚州有同燎毛斬關
直輕拉朽况奪路奪山馳驅方銳乎攻取而讓山讓路恭
順無替於初終既絕廣土之嫌自杜鑠金之謗在安疆臣
應優加職銜寵以章服之榮在隴澄應優加服色授以世
及之襲一體特加厚賚其諸目把陳恩柯阿箇等同土官
溫希舜宋顯印土舍李保等通候覈實功次分別議賞者
也未順宣慰彭元錦貌貅遶屯蟻蝨生胄烏江雖云少却
而首克險關之功當書告歸原係復讎而身被數矢之勇
亦烈相應厚賚者也泗城州土知州岑紹勳慷慨圖雪殺
恥殲渠破逆堪築鯨鯢之觀龍英州官男趙政立奮迅思

附驥踪斬關入固竝探狐兔之窟在岑紹勳首事未免失
律而勢實不支在趙政立後事或出因人而力則已竭岑
紹勳應加重賚伊男岑雲漢同趙政立各應給以冠帶仍
一體賞賚者也獨山州土同知蒙詔守興隆已能完璧攻
黃灘遂至空庭把總播州宣慰司土舍羅寵披髮篤復讎
之誼枕戈效討賊之忠保靖宣慰使彭養正平州司土官
楊治安土舍楊治隆南丹州土舍莫勞鎮溪所土官張元
虎張勝藻吳國輔張蘭冠帶頭目阿亮土官蔡國勳雍水
司土舍猶鶴楊通霑孫之襲皆效勞於行陣鎮遠府土同
知何守德土推官楊通淮新貴縣土縣丞甯甯國梁皆竭力

於運糧土舍楊國宏王家聘皆勩力於防守播民今充鄉
導千總冷狐遠彭廷志趙仁甫等俱應分別量賞內蒙詔
楊治隆效勞一年出兵獨多相應厚賚也原任戶科給
事中今爲民陳尚象助米一百石土官禮思明助硝一萬
斤宣慰安疆臣母鳳氏身臨賊境數月陸續發私倉米三
千石給軍武舉張鶴狝庶母章氏助米一百石土官安大
順助米一百石永寧衛監生宋仕通趙希伯袁任各助銀
一百兩生員沈繼祖聞於臯桑來鶴程雲路各助銀一百
兩壽官陳嘉猷助銀一百兩俱捐家貲共濟時艱雖云燭
火之光少助陽暉之明俱應優獎內陳尚象掖垣風高桑

梓義重家徒四壁公爾志私相應起用以紓厥猷禮思明
助硝萬斤量加服色鳳氏助米三千相應旌獎章氏百石
亦應量獎以勸土司者也原任總兵充爲事官今被逮童
元鎮又稱虎臣節擁上將兩關旣克而復失雖未收東隅
之功三捷旋踵而繼聞亦足雪於敵之恥况陳大縉陳邦
揚先登之兵皆本官銅粵携來之卒論罪誠無所逃論功
或足相贖第已經奉 旨被逮不敢擅議原任清浪叅將
今充爲事官劉效節守黃平一年頗效勞勩守東坡數月
亦無踈虞祇緣奉李總兵檄令其居守奉陳總兵檄令其
入營本官進退無據悻悻動氣跡似剛愎因而被叅相應

仍錄其舊功往復原職者也原任遊擊充爲事官今提問楊
惟中器埒斗筭心實徂儉龍泉失守已犯離局之條板角
協攻未見獲嘉之勇相應盡法正罪或以近日斬獲微功
姑令謫戍以免一死者也總兵標下中軍指揮陶汝夔體
貌本雄才猷亦裕但二豎爲祟於牀第一等未展於轅門
相應以疾革任者也偏橋衛提問指揮劉之屏本以多壘
因而舉囚據稱招撫似多徒矣然未解驗而徑云安置曷
釋羣疑據報斬獲似多級矣然未臨陣而何處得來難逃
公議此一臣者情罪未明難以功贖仍從原問歸結者也
葛彰司土官安其位地與播鄰情與播通賊有公移則頻

爲傳送賊出攻刦則頻供牛酒此一臣者當革職提問以
正其罪者也名色把總葉明遠徒負偉貌長懷市心竟違
命於指蹤遂奔北於行陣今已繫獄相應正法以戒懦怯
者也都察院咨送令史沈寔郭應明按察司送到臣處書
辦吏馬良臣鄭儀總兵李應祥下令史張思文左監軍書
辦吏王天民陳俊右監軍書辦吏孫仲良張問善匪獨案
牘勞形亦且艱危驚心似應比照九絲龔習箴空夏鄭天
寵等事例內將沈寔郭應明張思文各免考照依本等資
格就選馬良臣鄭儀等免其內外歷役考試照依本等資
格選用承差趙孟懿水陸間關晝夜奔馳似應比照空夏

杜詩等例免其外考其餘功次一聽巡按御史覈實序報
供事指揮千百戶州判縣丞主簿典史巡檢驛丞等官不
能盡錄聽臣分別獎賞外陣亡原任遊擊楊顯同伊男指
揮楊應芝舍人楊續芝廣西守備白明達貴州守備阮仕
奇霸陽守備陳雲龍龍泉司土官安民志千戶些嘉猷守
東坡百戶劉經仁冠帶總旗張翱把總張一仕賈文忠黃
文煥楊王王彥偉甘靖方朝宗許應元陳可行段承恩王
道王景陳啓禮督陣官何天慶奮勇擊賊爲國殞身既
勤王事於生前宜霈殊恩於身後在楊顯父子三人
同日俱陷白明達阮仕奇駢首就戮安民志罵賊被害忠

魂可愍在陳雲龍擅違將令厲魄堪憐且先有破關之功
後有死綏之苦當照王芬例贈官立廟於祖職外另蔭世
職些嘉猷張一仕等量贈一官厚恤其家以爲死事之勸
在營病故貴州指揮徐登階鍾英廣西總兵坐營官陳璵
雲南把總張應元雖未傳刃於腹亦云暴骸於野相應量
恤給以棺具陣亡各兵另行查出通候覈實再加優恤者
也原任四川左布政使今陞順天府尹程正誼江西左布
政使沈九疇福建左布政使朱運昌湖廣左布政使胡心
得河南左布政使姚學閔四川左布政使盛世承廣東左
布政使王泮廣西左布政使沈脩雲南左布政使梅淳帶

管臨安兵備道按察使鍾昌帶管曲靖兵備道副使孟紹
慶安普道副使黃文炳湖廣督漕副使薛士彥廣西賓州
兵備副使陳勗志共取亂美切株焚或爲晉人之角或爲
諸戎之犄相應竝賚內節六彥汎舟獨勞黃文炳督兵入
黔仍應優賚以旌勤勞者也舊鎮雲南黔國公沐昌祚新
鎮雲南總兵都督同知沐睿廣西總兵官李如樟雲南督
兵叅將盧承爵世受 國恩共拯鄰難或爲已先之輓或
爲彼先之推亦應竝賚內沐昌祚業已致仕助金二千相
應特 褒以示優異者也潯州府同知何文偉不畏險遠
押兵而無犯秋毫雲南署守備事指揮沐榮罔憚辛勤督

夷而與同甘苦相應并賚者也所據賊逆楊朝棟楊以棟
良棟惟棟竒棟勝棟等賊屬田氏小田氏賊女貞惠等賊
何漢良等同時國內擒獲俱經提督軍門審解 獻俘
彰 天威外內楊惟棟生死之報先後似涉參差實何
等供吐之誤研查委非欺弊此外則有逆首腹心惡黨
爪牙姦徒楊兆麟尚意夏文茂彭道陳大恩或以親枝總
管九族十二路之糧馬或以親暱贊決拒敵詐降之狡謀
阿萬揚正邊楊通漢等曾先鋒於飛練袁五受張守欽曾
首難於烏江馬騰漢之殺將綦南鼎壘彭永壽之拒敵窮
國文章之主謀探聽於都會皆兇逆貫盈罪惡滔天今大

愍既傳首於 國門各逆宜伏鑕於 闕下俱經臣差官
押赴總督衙門類解明正典刑除各哨功冊造送兵部覆
覈外伏乞 勅下兵部再加查議分別文武諸臣功罪上
一應善後事宜聽臣 同督臣經理條議另疏題
凡支用錢糧辨驗功級照例聽按臣覈 奏施行謹題

旨

